

Minister Visser na Parlamento

"Lotto pa Deporte ta morto y tin un debe di 37 miyon"



ORANJESTAD(AAN):— Un di e Ministernan cu a contesta pregunta di Parlamentarionan caba den e reunion pa tratamento di presupuesto tabata dr. Richard Visser, kende a hiba palabra durante dos ora largo.

El a bisa "mi a tuma dos ora pa contesta preguntanan y duna tur hende e sentimento di kico ta e trabou cu nos servicio bou di mi ta encera, pa bin cu un cambio, un cambio drastico y vision nobo."

Y e dos puntonan cu a tuma hopi tempo di dje tabata IMSAN y Lotto pa Deporte. Minister Visser a splica den detaye tur trabou cu mester a wordo haci pa logra loke logra como un direccion nobo den producto final. Y esaki ta encera tambe un cantidad grandi di leynan nobo cu lo bay wordo introduci pa por traha riba e cambionan.

Y pa splica esaki a tuma tempo pa e Parlamentario por comprende.

"Nos ta haciendo cosnan diferente cu nunca antes a wordo haci cu un presupuesto hopi preta," el a duna di conoce.

Un parti importante di e tempo cu e mandatario a hiba palabra den Parlamento, a bay dedica na IMSAN, pa splica kico lo wordo haci cune.

"IMSAN ta hopi importante pa nos, pero ta importante pa nos hacie bon," e mandatario a splica, y a agrega cu a cuminsa pa haci un limpieza y mester caba cu e construccinanan.

Djei sinta cu tur nan partneman pa mira e direccion cu ta bay y ta buscando ayudo cu Baptist pa duna IMSAN un toke diferente riba turismo medico.

Riba esaki un decision mester cay na september awor.

E mester wordo carga pa tur hende riba e tereno aki.

Otro punto importante ta Lotto pa Deporte. "Esaki ta un poz hopi hundo y stinki cu a haya eynan. Minister di Finanza a caba di haya un bista di tur cos....."

E rapport y investigacionnan cla. Y awor tin fase 2, pa haci cambionan.

"Lotto pa Deporte ta morto. E tin un debe di 37 miyon na banco. No tin placa pa deporte y ta pone mi den un situacion hopi fastioso cu e subsidionan y mester di placa cu ta bin di e finanza y esaki no tin awor. Nos ta trahando riba refinanciamiento y SOGA-deal cu e facilidadnan."

"E cos aki ta horrible pa deporte."

Awor ta bay pasa un amienda pa haya un miyon y pico pa por cumpli cu deporte y federacionnan, cual no tabata tin den ultimo 5 lunanan. En realidad mester di tres miyon pa deporte, facilidadnan, etc.